

Бахиллик

05:00 / 01.03.2017 3517

Ҳар бир мўмин-мусулмон банда ҳазир бўлиши лозим бўлган қалб хасталикларидан бири баҳилликдир. Баҳиллик луғатда карамлилик ва саҳийликнинг зиддидир.

Уламолар истилоҳида баҳиллик бир неча хил таъриф қилинган бўлиб, улар бир-бирларини тўлдириб келади.

Журжоний дейди: «Баҳиллик ўз молини ман қилишдир».

Яна: «Ҳожат тушганда ўзидан устун кўришни тарк қилиш баҳиллик ҳисобланади», деган.

Ибн Ҳажар: «Баҳиллик сақлаб турилган нарсадан талаб қилинганда ман қилишдир», деган.

Баҳиллик шариат истилоҳида бериш лозим бўлган нафақани қилмаслиkdir.

Баҳиллик энг ёмон хулқлардан бири ҳисобланади.

Баҳилликнинг даражаси иккитадир.

1. Ўзида бор нарсага баҳиллик қилиш.
2. Ўзгада бор нарсага баҳиллик қилиш. Бу энг ёмонидир. Уни «Нисо» сурасидаги:

«Баҳиллик қиласиганлар ва одамларни баҳилликка буюрадиганлар», деган оятдан билиб олса ҳам бўлади.

Уламоларнинг таъкидлашларича, баҳилликнинг энг ёмони кишининг ўзига ўзи баҳиллик қилишдир. Кўпгина баҳиллар мумсиклик қилиб молини ўзига сарфламай бемор бўлиб қолганлар. Улар даволанишга пул сарфлашдан ҳам баҳиллик қиласиганлар.

Аллоҳ таоло «Оли Имрон сурасида: «Аллоҳ ўз фазлидан берган нарсага баҳиллик қиласиганлар буни ўзларига яхшилик деб ҳисобламасинлар.

Аксинча, бу уларга ёмонликдир. Қиёмат куни баҳиллик қилған нарсалари ила бўйинлари ўралур. Осмонлару ернинг мероси Аллоҳгадир. Ва Аллоҳ қилаётган амалларингиздан хабардордир», деган (180-оят).

Ислом таълимоти бўйича, инсоннинг қўлидаги мол унга Аллоҳ Ўз фазлидан берган омонатдир. Шунинг учун у мазкур молни унинг ҳақиқий эгаси бўлган Аллоҳнинг розилиги йўлида сарфлаши керак. Аммо баҳиллик қилиб, молни сарфламай тўпласа, ўзининг кўзига яхши бўлиб кўрингани билан, аслида яхшилик бўлмайди. Ким баҳиллик билан тўплаган молини яхши-лик деб ҳисобласа, нотўғри ўйлаган бўлади.

«Аллоҳ Ўз фазлидан берган нарсага баҳиллик қилғанлар, буни ўзларига яхшилик, деб ҳисобламасинлар. Аксинча, бу уларга ёмонликдир».

Сиртдан қараганда, баҳиллик гўё молни муҳофаза қиласди. Тарқалиб, йўқ бўлиб кетишидан асрайди. Лекин бу мол беш кунлик дунёда тўпланади. Ўлиб кетса, қолади. Қолганда ҳам, баҳиллик ила тўпланганига бало-офтади бўлиб қолади.

«Қиёмат куни баҳиллик қилған нарсалари ила бўйинлари ўралур».

Бу ўралиш қандай бўлишини ҳадиси шарифдан билиб олишимиз мумкин.

Абу Ҳурайра розияллоҳу анҳудан ривоят қилинади:

«Расулуллоҳ соллаллоҳу алайҳи васаллам дедилар:

«Аллоҳ кимга мол берса-ю, у закотини бермаса, қиёмат куни мол унга икки холли улкан илон бўлиб кўринади ва бўйнига ўралади. Сўнгра икки чеккасидан тишлаб туриб: «Мен молингман, мен сен тўплаган хазинангман», дейди». Кейин: «Аллоҳ Ўз фазлидан берган нарсага баҳиллик қилғанлар буни ўзларича яхшилик деб ҳисобламасинлар», оятини охиригача ўқидилар».

Бухорий ривоят қилган.

Ибн Жарир раҳматуллоҳи алайҳ ривоят қилған бошқа бир ҳадисда Пайғамбаримиз соллаллоҳу алайҳи васаллам: «Бир киши ўз қариндошига келиб, Аллоҳ унга берган фазлдан беришни сўраса, у баҳиллик қилиб

бермаса, албатта, жаҳаннамдан катта илон чиқиб тили билан ялаб-ялаб бўйнига ўралур», деганлар.

Ҳа, инсон қанча яшамасин, қанча мол тўпламасин, барибир бир куни келиб ўлади ва молу мулкини тарк этади.

«Осмонлару ернинг мероси Аллоҳгадир».

Ҳамма-ҳаммаси Аллоҳга қолади. Ҳеч бир инсон дунёга устун бўлмайди.

«Ва Аллоҳ қилаётган амалларингиздан хабардордир».

Кимнинг баҳил, кимнинг баҳил эмаслигини жуда ҳам яхши билиб туради.

Аллоҳ таоло «Мұхаммад» сурасида: «Агар сиздан уларни сўраса, қийнаса, баҳиллик қиласизлар ва кек-адоватларингизни чиқарур», деган (37-оят).

Аллоҳ таоло Ўзи яратган бандаларининг сир-асрорларидан, камчилик ва табиатларидан хабардордир. У ҳамма нарсани била-ди. Шунинг учун ҳам аввалги оят охирида «...ва мол-дунёларингизни сўрамас», деган бўлса ҳам, ушбу оятнинг боши-да, агар сўраб қолса нима бўлар эди, деган саволга Ўзи жавоб бериб:

«Агар сиздан уларни сўраса»,

Яъни, мол-дунёларингизни беришингизни сўраса, сизга оғир туюлади, мол-дунёларингизни сарфлашга тегишли бўлган амр ҳақида ўйлаб қиласизлар. Ҳа, Аллоҳ сиздан молларингизни сарф қилишни сўраса,

«...қийнаса, баҳиллик қиласизлар...», демоқда.

Яъни, молларингизни Аллоҳнинг йўлида сарф қилмайсизлар.

Аллоҳ хоҳласа, ана шу тарзда

«...кеқ-адоватларингизни чиқарур».

Сиз ўзингиз сезмаган ҳолда айбларингизни ошкор қилиб қўясиз.

Кейинги оятда эса, дин йўлида мол сарфлашда содир бўладиган баҳиллик каби қийинчиликни қуръоний услубда муолажа қилинади.

«Хой сизлар. Анна ўшалар. Аллоҳнинг йўлида нафақа қилишга чақирилсангиз, бас, баъзиларингиз баҳиллик қилурсизлар. Ва ким баҳиллик қилса, албатта, ўзига баҳиллик қилур. Ва ҳолбуки, Аллоҳ бой, сизлар камбағалсизлар. Ва агар сиз юз ўгириб кетсангиз, сиздан бошқа қавмни ўрнингизга келтирур, улар эса сизларга ўхшаган бўлмаслар» (Муҳаммад: 38).

Ояти каримада Аллоҳ таоло инсон табиатининг қанчалик дақиқ билишини таъкидламоқда ҳамда воқеълик ҳақида хабардор қилмоқда. Ҳақиқатан ҳам ушбу ояти карималар нозил бўлиб тур-ган вақтда инсоният тарихида олтин саҳифалар бўлиб қоладиган саҳийлик, Аллоҳнинг йўлида мол сарфлашдек фазилатлар кўп мусулмонларга хос бўлиб, уларнинг бу борадаги ишлари мўъжиза даражасига бориб етгани тарих саҳифаларида боқий қолган.

Шу билан бирга, баъзи баҳиллар ҳам бўлган, бу ҳам воқеълиkdir. Қуръони карим ушбу оятда шу баҳилликни муолажа қилмоқда. Содир этилган баҳилликни муолажа қилинаётгани учун нидо ҳам ўшангага яраша бўлмоқда:

«Хой сизлар. Ана ўшалар».

Нима учун молларингизни ортиқча яхши кўрасиз?

«Аллоҳнинг йўлида нафақа қилишга чақирилсангиз, бас, баъзиларингиз баҳиллик қилурсизлар».

Бу жуда ҳам нотўғри, мўмин-мусулмон инсонга мутлақо тўғри келмайдиган иш. Наҳотки, молу дунёни ризқ қилиб берган зот Ўзининг йўлида ўша молу дунёning баъзисини нафақа қилишга чақирганда баҳиллик қилинса?!

«Ва ким баҳиллик қилса, албатта, ўзига баҳиллик қилур».

Ким хайр-эҳсон қилса, Аллоҳнинг йўлида сарф-харажат қилса, ўзига заҳийра тўплаган бўлади. Охиратда қачон хоҳласа, ундан олаверади. Ҳа, бу дунёда қилинган нафақа қиёмат куни учун тўплаб қўйилган эҳтиёт жамғарма ҳисобланади. Кимки бу дунёда Аллоҳнинг йўлида, дин йўлида сарф қилишдан қочса, ба-хиллик қилса, демак, ўзининг охиратдаги жамғармасининг кўпайишига қарши ҳаракат қилган бўлади.

Сиртдан мол-пулни тежаб қолиб, ўзига, оиласига, бола-чақасига ишлатганга ўхшайди-ю, лекин аслини олганда, барчани охират савобидан маҳрум қилган бўлади. Чунки нафақа қилса, ўзига қилган бўлади. Аллоҳ

таоло эса ҳеч кимнинг нафақасига муҳтож эмас:

«Ва ҳолбуки Аллоҳ бой, сизлар камбағалсизлар».

Қўлларингиздаги мол-дунёни вақтинчалик, сизларни синаш учун Аллоҳнинг Ўзи берган-ку! Ўша Ўзи берган молдан нафақа қилсангиз, уни сақлаб, кўпайтириб қайтарадиган ҳам Ўзи-ку! Қайси тарафдан қаралганда ҳам камбағалсизларсиз. Ҳожатманд сизларсизлар, дейилмоқда. Қўлиздаги молни Аллоҳ берган бўлса, улардан савоб ҳосил бўлса, савобни берувчи ҳам Аллоҳнинг Ўзи бўлса, унда нимага Аллоҳнинг дини йўлида баҳиллик қиласиз?!

Исломга даъват, динга хизмат қилиш Аллоҳнинг бандасига берган улуғ неъмати ва эъзозидир. Ушбу улуғ ишончга муносиб бўлмай, қўрқоқлик, дангасалик ва баҳиллик қилсалар, Аллоҳ берганини қайтариб олиб, улуғ неъматини қадрини биладиган бандаларига бериш ҳеч гап эмас.

«Ва агар сиз юз ўгириб кетсангиз, сиздан бошқа қавмни ўрнингизга келтиур».

Албатта, янги қавм аввалгисига ўхшаб қўрқоқ, дангаса ва баҳил бўлмайди.

«...улар эса, сизларга ўхшаган бўлмаслар».

Аллоҳ таоло «Нисо» сурасида: «Улар баҳиллик қиладиган, одамларни баҳилликка бую-радиган ва Аллоҳ уларга Ўз фазлидан берган нарсаларни беркитадиганлардир. Ва кофирларга хорловчи азобни тайёр-лаганмиз», деган (37-оят).

Аллоҳ баҳилларни, баҳилликка буорадиганларни ва Аллоҳ уларга Ўз фазлидан берган нарсаларни беркитадиганларни хуш кўрмайди. Баҳил одам ўз қўлидаги неъматни ўзи яратгани йўқ, балки бу неъматни унга Аллоҳ берган. Аммо бу инсон шу нарса-ни ўзига ўхшаган, аммо ҳозирда оғир аҳволга тушиб қолган бошқа бир инсонга беришдан қизғанади.

Баҳиллик жамият аъзолари ичida бир-бирини кўра олмас-ликка, турли фитналар келиб чиқишига сабаб бўлади.

Абдуллоҳ ибн Амр розияллоҳу анхудан ривоят қилинади:

«Расууллоҳ соллаллоҳу алайҳи васаллам хутба қилдилар ва:
«Бахилликдан сақланинглар. Чунки у сиздан олдингиларни ҳалок қилган.
Уларни базилликка амр қилди, бахиллик қилдилар. Уларни алоқаларни
узишга буюрди, уз-дилар. Фужурга буюрди, фужур қилдилар», дедилар».

Абу Довуд ривоят қилган.

Мазкур номаъқул инсонлар ўzlари бахиллик қилганлари ет-маганидек,
бошқаларни ҳам бахилликка буюрадилар. Шу билан бирга, Аллоҳ таоло
томонидан берилган неъматларни беркитади-лар. Одамларга кўрсатишдан
қочадилар. Одамлар билиб қолмасин, деб ўzlари ҳам емай, ичмай, киймай
кун кечирадилар.

Имрон ибн Ҳусойндан ривоят қилинади:

«Расууллоҳ соллаллоҳу алайҳи васаллам: «Агар Аллоҳ бир бандага
неъмат берса, унинг асари ўша бандада зоҳир бўлишини яхши кўради»,
дедилар.

Ояти кариманинг охирида: «Ва кофирларга хорловчи азоб-ларни
тайёрлаганмиз», дейилишидан бу ояtlар кимлар ҳақида экани яна ҳам
равшан бўлади.

Абу Бакр розияллоҳу анҳудан ривоят қилинади:

«Набий соллаллоҳу алайҳи васаллам: «Жаннатга буз-ғунчи ҳам, миннатчи
ҳам, бахил ҳам кирмайди», дедилар».

Ушбу ҳадиси шарифда зикри келган учта ёмон хулқдан узоқда бўлиш
зарур.

Абу Саъид розияллоҳу анҳудан ривоят қилинади:

«Набий соллаллоҳу алайҳи васаллам: «Икки хислат мўминда жам
бўлмайди: бахиллик ва бадхулқлик», дедилар».

Иккисини Термизий ривоят қилган.

Мўминлик улкан шарафдир. Мўмин киши ҳусни хулқ соҳиби бўлади. Унда баҳиллик ва бадхулқлик каби ёмон хислат-лар тамоман бўлмайди. Бунга ўхшаш ёмон ахлоқлар билан иймон бир шахсда жам бўла олмайди.

Бахилликнинг заарлари:

1. Бахиллик иймон билан жам бўлмайди.
2. Бахиллик кўпгина нуқсонларнинг аслидир.
3. Бахиллик кўплаб ёмон хислатларга сабаб бўлади.
4. Бахиллик Аллоҳ таолога ёмон гумонда бўлиш аломати-дир.
5. Бахиллик ақлнинг озлиги ва тадбирнинг ёмонлигига да-лилидир.
6. Бахиллик инсонни ҳалокатга элтувчидир.
7. Бахиллик ахлоқни бузувчидир.
8. Бахиллик улуғнинг обрўсини тўкади.
9. Бахил бу дунёда маҳрумдир, охиратда малъундир.

Бахиллик чегараси:

Уламолар баҳиллик чегараси ҳақида ўзига хос баҳс юритган-лар. Баъзилар, сарф қилиниши вожиб бўлган нарсани ман қилиш баҳилликдир. Ўзига вожиб бўлган нарсани адo қилган шахс баҳил бўлмайди, деганлар.

Бу гап унча тўғри эмас. Ҳоким ўзига белгилаб берган миқдорни аҳли аёлига бериб, ундан зиёда ҳеч нарса бермай қўйган одам баҳил бўлади.

Тўғриси баҳилликдан қутилиш учун шариатда вожиб қилинган миқдорни бериши билан бирга муруватта тақозо қиладиган нарсани ҳам сидқи дилдан бериш керак бўлади.

Шариат вожиб қилган нарса закот ва аҳли аёлнинг нафақасидир.

Муруватта тақозо қиладигани эса, торлик вужудга келтирмас-лик ва майда-чуйда нарсаларга ҳам эътибор беравермаслиkdir. Чунки бу ҳолатни

одамлар пасткашлик дейдилар.

Бу нарса ҳолат ва шахсларга қараб турлича бўлади. Камбағал учун пасткашлик бўлмаган нарса бой учун бўлиши мумкин. Кишининг тор олиши бола-чақасига қилинганда пасткашлик бўлса ҳам, бегонага қилганда бўлмаслиги мумкин.

Бахил шариат ҳукми ва мурувват тақозоси ила ман қилиш мумкин бўлмаган нарсани ман қилган шахсадир.

Шариат вожиб ва мурувват тақозо қилган нарсани bemalol сарф қилган киши бахил дейилмайди. Ammo бундан яна ҳам зиёдани сарф қилмагунча сахий ҳам бўла олмайди.

Бахилликнинг давоси:

Бахилликнинг асосий сабаби молга бўлган ортиқча муҳаббатdir. Бу муҳаббатнинг икки сабаби бор.

Биринчиси, Орзуни узун қилган ҳолда молсиз эришиб бўлмайдиган шаҳватларга муҳаббат қўйиш. Умиди узун бўлмаса, бола-чақаси ҳам узун орзу ўрнига ўтаверади.

Иккинчиси, молнинг ўзига муҳаббат қўйиш.

Баъзи одамларнинг умрбўйи етиб ортадиган молу мулки бўлади. Ўзи қариб чириган бўлади. Шунда ҳам ўзига вожиб бўлган молни чиқармайди, садақа ҳам қилмайди. Ўлса моли душманларига қолишини ёки зое бўлишини ҳам билади. Бу даво-си йўқ дарддир.

Бу худди бир одамни яхши кўриб юриб унинг элчиси келганда маҳбуни қўйиб элчини яхши кўриб қолган одамга ўхшайди. Зотан молу дунё ҳожатларни чиқарувчи элчидир. Ҳожатини эсдан чиқариб динорнинг ўзига муҳаббат қўйиш залолатдан бошқа нарса эмас.

Ҳар бир нарсанинг иложи унинг зидди билан бўлади. Шаҳватларга берилиш қаноат ва сабр билан даволанади. Умидни узун қилиш ўлимни кўп эслаш билан даволанади.

Ўзида бахиллик дардининг аломатларини сезган одам унинг ёмонлиги ҳақидаги оят ва ҳадисларни кўп ўқиб юрсин. Бахилликнинг заарлари ва

оқибатини эсга олсин. Сахийликни эсга солувчи оят ва ҳадисларни ўқиб, амалини шунга түғриласин.